



11. oktober 2022

UKA 2022/119

Kalaallit Nunaanni pinerluttulerinermi inatsisip allanngortinneqarnissaanut inatsimmut missingiutip (akuersissuteqaqqaarnissamik tunngavilimmik pinngitsaaliilluni atoqatiginninneq pillugu aalajangersagaq) Kalaallit Nunaanni Namminersorlutik Oqartussanit akuersissuteqarnissaa pillugu Inatsisartut aalajangiiffigisassaattut siunnersuut.

(Aatsitassanut Inatsisillu Atuutsinneqarnerannut Naalakkersuisoq)

Siumup pingaartilluinnarpaa inuiaat inatsisitigut illersugaanerisa qulakkeersimajuarnissaa. Taamaattumik Siumup eqqartuussiveqarnerup aammalu pinerluttaalisitsinerup pitsannorsartuarnissaanut nukittorsartuarnissaanullu peqataassaaq peqataajuassallunilu.

Nunatsinni kinguaassiuutitigut peqquserluuteqartarnerit amerlasoorujussuunnerannut oqariartuutaasartut misissuinerit assigiinngitsut takutittaraat Siumumi ajuusaarnartutut isumaqarfigaarput. Taakkualu peqquserluuteqartarnerit ajoraluartumik takutittarpaat meerannguaniiit utoqqarnut kinguaassiuutitigut peqquserluttarnerit pisartut – tamannalu annernarluinnaqqissaarpoq, taamaammallu ajornartorsiutip millisaaviginissaanut, ajornanngippallu nungutinnissaanut inuiaqatigiittut iliuuseqartuartaqartugut Siumumi isumaqarluta.

Ukiopassuannngortuni pinaveersaartitsineq annertoq inuiaqatigiinni ingerlassimagaluarlutigu kinguaassiuutitigut peqquserluuteqartarnerit ataatsimut katikkaanni malunnaatilimmik appariaateqarneq ajornerat assorsuaq uggornartuuvooq, akiuniarnermimi inuppasuit nukippasuillu atorneqartarput ilaatigut soorunami iluatsitsiffiusartumik. Pinaveersaartitsinernilu taakkunani nikallujaallutik suliaqartut suliaqartarsimasullu Siumumiit aammaarluta qamannga pisumik qutsavigiumavagut.

Qujanaqisumik kinguaassiuutitigut peqquserluuteqartarnerit akiuniarneranni ukiuni kingullerni annertuutigut suliaqartoqartuarpoq, akiuniarnermilu ukkatarinninnerup suli nukittorsarneqartuarnissaa pingaaruteqartut Siumumi isumaqarfigaarput, kinguaassiuutitigummi innarliisarnerit malunnaatilimmik appariaateqarnissaat angutserlugu suliaqartuartaqaratta.

Pinerluttulerinermi inatsisip ilusilerneqarnermigut pitsaasutut Siumumiit isumaqarfiginaraluartoq, siunnersuummi matumani anguniarneqartut eqqarsaatigalugit pinerlineqartartut aammalumi pinerlineqarsinnaasut ullumikkornit suli inatsisitigut illersorneqarnerunissaat anguneqarsinnaammat Siumumiit toqqissisimanarnerusutut isumaqarfigaarput.

Maannamut pinngitsaaliilluni atoqateqartarnermut inatsisitigut aalajangersarneqarsimasut tasaanerupput timimik akiusinnaajunnaartitsilluni pinngitsaaliinerit, siorasaarinnermik assigisaannilluunniit sakkoqarluni pinngitsaaliinerit, ukiukitsunik pinngitaaliinerit, inummik akiusinnaassuseqanngitsumik aammalu imminut illersorsinnaassuseqanngitsumik pinngitsaaliinerit ilaalu ilanngullugit.

Siunnersuutilli massumap pinerlineqarsinnaasut allat suli inatsisitigut illersornerusinnaagai naatsorsuutigineqarsinnaasoq Siumumi isumaqarpugut, tassami siunnersuutip massumap atuutilersinneratigut kinguaassiuutitigut iliuuseqarnerni tamani illuatungeriit tamarmik kissaataannik tunngaveqarnissap ersersinnissaa pingaaruteqarlunarpq. Tassalu illuatungeriit nammineq



kajumissusertik tunngavigalugu atoqatigiinneq pilersissavaat, taamaattoqanngippat pinngitsaaliinerusaaq.

Pinngitsaaliineq tassaavoq inunnut navianaatilimmik pinerluuteqarnerit ilungersunarnerpaat ilaat, taamaammallu tamassumap pinnginnissaanik pitsaasunik malitassaqarnissaq aalajangersagaqarnissarlu sakkussaapput pitsaanerpaat. Taamatuttaaq pitsaasunik inatsisitigut sinaakkuteqarneq eqqaarsaatigalugu, inuiaqatigiit qaammarsaavigineqartuarnissaat pingaaruteqarluinnartuq Siumumi isumaqarpugut, soorluttaaq inatsisissami matumani anguniarneqartumi tamanna aamma kajumissaarutigineqartuq.

Siumumiit taamatut isummersuuteqarluta, suliap inatsisinut ataatsimiititaliami suliarineqarnissaa inassutigaarput.

Anders Olsen, Siumut.